

東
華
續
錄

東華續錄

道光十四

臣王先謙敬編

臣周綱蕃恭校

秋七月壬午諭軍機大臣等據張井奏熟籌啓放王營減壩實無把握不敢回護前議並以地勢之曲直高下及民閒田畝計之將來不得不慮者有三請仍由李工改河避淤較爲暢順等語改河之議原係張井始爲此奏迨將伊調任南河合與琦善等會同妥議則以改河口門有碑石阻遏諸多窒礙莫如開放減壩之較爲得力聯銜覆奏是以降旨照該督等所議辦理見已遲至月餘一切應行培築之圈堰格隄等工俱經勘估興辦而張井復以啓放減壩實無把握改河避淤實可辦理再行奏請該河督旣知啓壩有此三患前此聯銜會奏何以並未慮及迨經給事中楊煊陳奏

輒又申理前說似此游移無定豈大臣事君之道見已盛漲屆臨若不堅持定見反覆遷延何時集事前於琦善奏到時已降旨責令趕辦減壩事宜務於秋深啓放禦壩以期回空船隻如期歸次總之減壩之議原爲減落黃水刷滌河身起見該督等固應籌及久遠亦不能不先計目前此時該督等惟當遵照前旨辦理減黃出清俾河湖不至有意外之虞並使本年回空全數南下明年重運照常北來方爲不負委任至於改河一事無論可行與否總須俟三汛安瀾後該督等再行會同詳加履勘和衷商榷勿得各存成見悉心定議具奏再降諭旨○普恭以病免以博啓圖署禮部尙書部左○壬辰命武隆阿爲欽差大臣督辦臺灣勦匪事宜以陳中孚署山東巡撫穆彰阿署漕運總督○召楊懋恬來京以嵩孚兼署湖北巡撫○癸巳諭軍機大臣等本日據慶祥奏張

格爾率領安集延布嚕特五百餘人由開齊山路突進經舒爾哈善等帶兵迎截共殺賊四百餘名生擒四十餘名賊分路竄回見請添兵防堵又據慶廉奏接到英吉沙爾咨文喀城回子全行變亂道路不通萬分緊急見咨長齡酌發精兵救援伊犁爲新疆重地該處領隊大臣穆克登布烏凌阿等已在喀什噶爾防勦所存官兵勢難再行分派該將軍總統新疆地方尤不可輕舉妄動惟當相機調度設法策應其各城附近喀什噶爾地方回子是否安靜並著加意嚴防朕見派署陝甘總督楊遇春選帶精銳將弁統領大兵前赴回疆籌辦勦捕事宜所有南路各城務宜嚴密查察妥爲防守不可稍有疏虞此爲至要○命楊遇春爲欽差大臣督勦逆回以鄂山署陝甘總督○甲午諭軍機大臣等昨據烏什辦事大臣慶廉馳奏喀城回子全行變亂當降旨令長齡相機調度

設法策應不可輕動並派楊遇春爲欽差大臣選帶精銳將弁統領大兵赴回疆籌辦勦捕事宜本日又據印登額等馳奏葉爾羌參贊吳亨佑全軍被陷見在賊勢猖獗欲攻英吉沙爾朕心正深注念適接長齡奏報接慶祥來咨喀什噶爾被圍見調烏嚕木齊官兵四千名伊犁兵二千名星馳前往伊犁地方緊要長齡在彼駐守調遣策應所見甚是見在喀什噶爾被圍日來又未據慶祥奏報該處嬰城固守必須援兵早到內外夾擊方保無虞此次所派領隊大臣祥雲保等由冰嶺行走自應迅速達凌阿帶領烏嚕木齊兵四千名是否起程未據奏報著卽趕緊前往相機前進毋稍遲誤伊犁領隊大臣俱已派往喀什噶爾止有恩緒一人並不同城著派布彥泰那桑阿忠山馳驛前往伊犁作爲領隊大臣交長齡差遣朕念吐魯番乃新疆各城扼要之地已降旨令多隆武

帶兵駐紮策應所奏哈密爲新疆咽喉要地必須大員帶兵駐紮
昨已有旨令楊遇春於陝甘兩省選派精銳官兵分起前進所有
長齡調兵三千名卽交楊遇春統帶齊愼不必前往楊遇春出嘉
峪關探聽各城軍情隨時馳奏至哈密地方駐紮再定行止長齡
惟當飛飭各城加意防範以待大兵雲集毋稍疏虞所有軍需糧
餉准其調鎮迪道庫備貯銀十萬兩卽飭英惠撥解帶往所有烏
魯木齊提督印務卽著英惠兼署再蘇倫保咨調喀喇沙爾所轄
土爾扈特和碩特援兵已諭巴哈布如未調遣卽行停止○己亥
以故和碩莊親王蘇謀子奕寶襲爵○庚子以浙江樂清慶元二
縣糧價漸增發倉穀平糶○辛丑諭軍機大臣等長齡奏喀什噶
爾葉爾羌各臺站送回滋事情形覽奏實堪憤恨喀什噶爾葉爾
羌尙未得實在情形伊犁援兵二千計七月望間可抵阿克蘇烏

噶木齊官兵四千計八月初旬纔可到彼見在賊勢甚眾斷非六七千兵力所能痛勦萬一輕率前進轉致腹背受敵墮賊奸計著長齡卽飭祥雲保碩隆武達凌阿等沿途偵探何處可以駐紮卽在何處會齊等候大兵雲集會合前進見已飭甯夏將軍格布舍帶兵二千名前赴哈密駐紮以壯聲援諸事與楊遇春商辦楊遇春帶領陝甘兵五千五百名計八月中旬可抵哈密相機堵剿又另降諭旨令富俊祿成挑吉林黑龍江兵各一千名派副都統帶兵不日前赴軍營聽楊遇春調遣○甲辰諭回疆逆裔張格爾潛謀煽惑前命楊遇春爲欽差大臣帶領陝甘精銳格布舍帶領甯夏官兵並調烏魯木齊提督達凌阿伊犁領隊大臣祥雲保等帶領各該處滿漢官兵前往勦辦統計將及二萬名見又飛調吉林黑龍江勁旅數千前往協剿自必所向有功惟思命將出師事權

宜歸統一大學士伊犁將軍長齡公忠體國老成幹練著授爲場
威將軍並由京頒給印信軍營大小官員悉聽節制楊遇春前已
頒給欽差大臣關防計已自甘肅起程武隆阿由山東來京陛見
亦著頒給欽差大臣關防與楊遇春俱參贊軍務武隆阿起程時
朕再揀派巴圖魯侍衛隨同前往其京營曾經出兵得力官員著
武隆阿奏明帶往如有續行添調官兵之處並著長齡等一面奏
聞一面飛調至軍火糧餉一切經費已飭戶部速行籌款源源接
濟兵精糧足天戈所指無難悉數埽除第念喀什噶爾回子久隸
版圖素稱恭順卽布嚕特部落亦輸誠歸化有年此次句結滋事
自係逆裔張格爾煽惑所致其中甘心助逆者諒必無多大兵到
日其被脅附和之眾果能解甲迎降投誠乞命皆可量予寬貸仍
令各復舊業儻敢執迷不悟抗拒大兵必應殄滅醜類俾無遺種

該將軍等務當合力同心善體朕意恩威並用首先效順者許以自新負隅不悛者盡行剿滅尙其迅奏膚功綏靖邊域用副朕勦逆安良至意○乙巳命盧坤馳往甘肅同鄂山督辦糧運○丙午諭軍機大臣等琦善等奏會籌減壩事宜請酌撥經費一摺前因該督等會議啓放減壩一切挑河開壩及撫恤等項需費甚多當飭戶部豫爲籌款備用茲據奏已定於八月內開放減壩約需銀三百八十萬兩除先撥粵海關稅銀六十萬兩外再請撥帑三百二十萬兩著戶部卽將前此籌備工需銀兩速議明春動撥行令迅解工次以資應手至開放減壩原爲落黃洩清之計必使黃減而禦壩卽開清減而湖漲可洩漕運復舊隄堰無虞卽數百萬帑金朕原不加靳惜惟旣經啓壩之後能否全行奪溜騰出正河設法疏濬總須確有把握據奏堵其支流宣其去路皆前兩屆未及

審度之事該督等此次豫爲籌備因應如此辦理將來堵築攔黃大壩必須將中段高仰之處大加挑治期於一律深通方可收一勞永逸之效若止補救目前謂本年禦壩可開回空可渡而明年重運北來仍難保必無阻滯或一年之間漕運可以暫通而經久仍不能無誤是不特運道不通而河朔之敝壞伊於何底前降諭旨垂詢甚明該督等務將開壩後黃水必能斗落清水必能暢出帑項不至虛糜確有成效之處切實由驛速奏以慰廑注再本日據陶澍奏本年啓放濱湖及運河各壩較早僅留昭關壩一處係前月奏明不開之工足衛下游田畝六月二十七日琦善路經該處亦諭該員得守且守迨三十日參將張兆前來看視卽日將昭關壩開放所有稻田遂歸巨浸而去路不暢湖水仍未消落徒積於下河數百里汪洋一片田畝刻難涸復等語昭關壩既經該督

等飭諭各員得守且守何以甫逾三日該參將張兆卽往開放是否該督等飭令前往抑該參將擅作主張著查明據實具奏且啓壩原爲減洩湖漲乃減水無多徒使田禾被淹居民失業成何事體並著該督等嚴飭該管員弁將下游歸海各河速議疏挑俾積水暢消民田涸復無誤將來播種以蘇民困○戊申諭逆裔張格爾恃有白帽回子爲之接應竟敢糾同布魯特突入卡倫屯集回莊作亂經慶祥先期訪獲奸細究出謀逆情由豫派領隊大臣烏凌阿穆克登布帶兵迎擊殺傷賊匪四百餘人已將該逆裔圍入回莊大瑪雜內因夜雨昏黑草深樹密逆裔張格爾捨死突出逃逸官兵正在追捕該逆回等聞風響應分路迎拒官兵腹背受敵烏凌阿穆克登布竟被槍傷陣亡效命捐軀深堪憫惻烏凌阿穆克登布俱著加恩晉贈都統銜照例賜卹傷亡官員兵丁著該將

軍查明咨部照例卹賞○諭軍機大臣等長齡奏續接據總管額爾古倫稟報喀什噶爾被圍情形及籌辦進援防守各事宜並將該總管等原稟進呈一摺喀什噶爾城門已被賊匪自外堵砌日夜圍攻能否保守至今未得確信英吉沙爾葉爾羌距喀城甚近勢亦難免該逆等窺伺該將軍請於伊犁烏嚕木齊官兵到後湊足七千兵力前往救援惟該處賊匪多出沒無定此時進兵往援必能大挫賊鋒使之膽落方於全局機宜有濟若計算兵力尙單止宜在阿克蘇暫時屯駐不可冒昧輕進致墮賊人奸計本日據楊遇春奏於七月二十六日選帶本標官兵一千五百名先行馳往並卽諭令該署督於出關後探聽前路情形再行督兵會合相機前進阿克蘇爲回疆通中要路務當嚴兵固守加意防範毋稍疏虞至請令齊慎帶兵赴阿克蘇防守之處前因楊遇春奏調

提督楊芳總兵呂天俸帶兵往剿已諭知該署督陝甘兩省提督
未便俱令帶兵遠出總須酌留一員在任俾資彈壓楊遇春馳抵
哈密一帶應否派得力提鎮一員帶兵赴阿克蘇防守之處該將
軍卽馳商辦理至錫伯帶兵總管額爾古倫等官兵共六百九十
餘員名未能捐軀行陣退回阿克蘇本應按軍法治罪姑念事起
倉卒當逆回羣起爲亂時賊勢甚熾原不應派兵輕出至令腹背
受敵且該官兵等因城門被賊匪堵砌不能入城尙與臨陣逃回
者有聞著貸其一死俱行斥革交該將軍飭令各帶原兵在軍前
效力自贖又另片奏見署阿克蘇阿奇木伯克色提巴爾第年力
已衰請令伊薩克署理所奏是伊薩克曾任阿克蘇阿奇木伯克
熟悉該處情形著准其署理飭令該伯克妥爲安撫回厥爲要烏
凌阿穆克登布所遺伊犁領隊二缺已有旨將布彥泰忠山補放

矣至內地官兵行至口外應行調馬更換及就近調取烏什存貯小麥磨麵借用之處該將軍隨宜調度不必事事候旨遵行前經戶部籌撥餉銀三四百萬兩迅速解往又派前陝西巡撫盧坤前往甘肅會同鄂山督辦軍需糧運一切事宜自當源源接濟不至短絀遲誤朕命該將軍總統軍務信任綦專凡軍前一切事宜惟當竭誠盡智隨時相機妥辦遇有應商之事與楊遇春武陞阿和衷商揔期臻妥善朕委心任用不爲遙制該將軍亦勿恤人言稍存顧慮也○是月賑江蘇高郵等六州縣水災給湖南醴陵等三州縣山西歸化城水災口糧貸陝西西鄉整屋二縣水災籽種奉天錦州府屬各驛馬乾銀緩徵浙江嘉善平湖二縣興修水利貸

款

八月庚戌朔諭孫爾準奏抵臺查辦北路械鬭情形及參辦理錯

誤之提鎮副將各一摺寬奏俱悉此案臺灣匪徒李通等挾黃文潤按賊之嫌糾眾尋鬪黃文潤集眾抵禦格殺二人匪徒隨造分類械鬪之譏乘機焚搶經該縣王衍慶手刃數賊匪徒遂鼠彰化境內該提鎮等誤執民自械鬪官兵止可彈壓不便加誅之說致該匪等益無忌憚具結復鬪見因官兵雲集均已解散該督就獲犯供出及難民控指已有五百餘人令各莊總董頭人按名縛送並將著名匪類最多村莊帶兵圍捕指日即可肅清該督務將著名賊首嚴拏務獲盡法懲治附和者隨時解散不必株連以除頑莠而安良善至撫卹事宜著照所請查明瓦草房間照例分別給銀俾令自行搭蓋以資棲止流民還定安集自可日見殺數所辦俱是提督許松年未能痛加懲辦乃邀集總董勸令講和失體損威辦理已屬錯謬又監提尙未定讞之兇犯吳裕等作綫並身在

行閒乘坐肩輿何以率先將士許松年著卽革職留臺交孫爾準差遣效力贖罪總兵蔡萬齡統轄全臺營匪徒肆橫並不立時撲捕殊屬畏葸亦著革職見有經手事件著暫留臺鎮之任北路協副將趙裕福一籌莫展庸懦無能著卽革職以示懲儆○辛亥參贊大臣武隆阿率巴圖魯侍衛章京等陛辭 上御出入賢良門

訓示方畧○以顏伯燾署陝西布政使何承燾署陝西按察使

安道署

○王子諭軍機大臣等本日據長齡奏籌派官兵及伊薩克

回兵由草地前往葉爾羌救援一摺同日又據印登額等奏拏獲

逆匪辦理及長清奏偵探葉爾羌賊匪漸偏催兵救援並奕湄等

奏派兵聽候調遣各摺覽奏俱悉和闐草地既可通達自應亟發

官兵出其不意前往救援該將軍奏請飭甘肅提督齊慎帶兵前

駐阿克蘇以爲聲援前經降旨令楊遇春於提督齊慎楊芳二員

內酌令一員回任彈壓見在齊慎早經奏報起程計此時可抵哈
密卽飛飭齊慎星速馳赴阿克蘇駐守令楊芳回任如接奉前旨
已令齊慎回甘卽令代齊慎帶兵之大員星速前往長齡俟德英
阿到伊犁卽星赴軍營總統軍務長齡未到任以前一切軍務著
楊遇春隨時相機調度總期於事有濟務保萬全至張格爾之弟
巴布頂前據慶祥奏去年九月閒在鄂羅退帕地方身故乃本日
印登額等奏審訊阿布都拉差人牙伙普等有巴布頂已將英吉
沙爾城池攻破等供長齡到軍營卽查明該逆實在下落覆奏至
阿布都拉一犯身爲阿奇木伯克不圖報效膽敢從逆並約鄰封
伯克獻城助逆狼子野心可惡已極長齡到軍營後務將該伯克
擒獲照叛逆律盡法處治毋任漏網○乙卯諭軍機大臣等富俊
奏流民無籍可歸一時難令遷移額懇免其驅逐仍嚴行查禁不

准再有潛住等語吉林爲我朝根本之地該將軍等既聽流民潛住漫無覺察迨積漸增多輒以窮民無籍可歸難令驅逐失所妄思乞恩朕撫有寰區豈不知痾瘵在抱惟此案無業流民始而爲傭工遠出投身服役繼則漸向旗人佃種田畝迨佃種既多旗人咸曉安逸不知力作必致生計日蹙且耳濡目染習成漢俗不復知有騎射本藝積重難返其害豈可勝言若如所奏從此責令官兵常川稽查不准再來潛住果能如此令行禁止見在流民何至遂有一千餘戶之多前此既已容留則此後嚴查禁絕亦止紙上空言數年之後必又漸積至一千餘戶該將軍不過援照成案一再乞恩而於培養根本之計有何裨益夫涓涓不塞遂成江河若不亟加整飭於此時准此弊政不思遠圖朕固不能辭責而爲是奏者則自富俊始試問能當此重咎否也富俊歷任最久見又仍

茲斯任著卽揀派能事文員會同協領等詳查妥辦該流民等違禁潛往居住本應照例究治此時卽釐行驅逐亦屬格外施恩惟念該流民無籍可歸未忍遽令失所該處東近遼山西近圍場斷不容令其仍前居住該將軍當不憚繁難另籌善策於吉林所屬各廳或盛京所屬各廳州縣酌分戶口指出地方卽令遷移務使分隸散處不至聚集一處方爲妥善至該流民等所蓋房閒所墾地畝原非伊等本業念其懇種日久酌中給價收回亦可爲將來移駐京旗之用總使清源截流毋得仍滋流弊該將軍如能辦理周妥不但免其前譴卽歷任將軍副都統等處分亦當曲爲寬貸也所開歷任失察將軍副都統等名單俟將來查辦流民事竣再降諭旨○召惠顯來京以吳榮光爲福建布政使前任貴州布政使○召吳廷琛來京調翟錦觀爲雲南按察使以鄂順安爲福建按察使

由浙江

○丁巳諭軍機大臣等新疆回部向隸準噶爾悉索敝

賦不堪苦累其附近布噶特者搶劫剽掠尤不勝其欺陵自我朝
平定回疆以來各城回子咸隸版圖納賦交糧輕減者奚啻倍蓰
而布噶特亦震懾天威不敢入卡滋擾八城回子安居樂業者垂
六十餘年雖其結習崇信和卓而愚回素性恇怯久已習爲恭順
何至遽思變亂總由近十餘年歷任參贊辦事大臣等貪淫暴虐
回子等忿恨忍受當時伊犁將軍或漫無覺察或隱忍不言迨至
嘉慶二十五年經朕降旨飭交慶祥詳察亦復徇隱未經據實具
奏馴至釀成變亂此時雖已聲罪致討而致亂之由不可不根究
確實縱不遽正刑誅亦當明示譴罰長齡昇任伊犁將軍見令總
統軍務著於前赴軍營時沿途細加察訪以此時之物議證諸曩
日之聽聞務將近十餘年歷任各員某某等在任公廉稱職爲回

子等所感服某某等在任荒謬爲回子等所痛心疾首逐一查明分別等差據實具奏毋得稍有隱諱至巴彥巴圖上年輕出卡倫妄殺汰劣克家屬一節慶祥所奏起釁根由及巴彥巴圖陣歿情形聞尙有回護不實不盡卽如巴布頂尙在而慶祥奏其已故此其一端儻慶祥到任後有失回眾之心及墮奸計之處一併詳查覆奏如巴彥巴圖有妄殺汰劣克家屬之事汰劣克亦可量從末減也再見在張格爾糾約回子布噶特逞其兇狡其中甘心從逆者諒必無多回子素性多疑將來大兵雲集未必不以爲玉石難分羣生畏懼或更爲逆裔等煽誘裹脅該將軍進兵之始卽當用揚威將軍銜廣張告示殫行曉諭以該回眾等久隸版圖素稱恭順卽布噶特輸誠歸化歷有年所此次勾結滋事自係被張格爾蠱惑所致豈必盡皆甘心從逆見命揚威將軍統領大兵數十萬

分路進剿天戈所指原期殲厥渠魁其甘心助逆者亦無難悉數
誅夷第念爾回子布魯特恐我大兵壓境不免玉石俱焚以致心
存疑懼用特剴切曉諭凡前被逆裔煽誘者果能解甲迎降投誠
乞命皆當量予寬貸仍令各復舊業如能將張格爾縛獻軍前無
論回子布魯特俱當奏明大皇帝錫封王爵賞賜十萬金從前平
定回疆時如額敏和卓鄂斯璫霍集斯等輸誠效命懋賞滿封世
襲罔替卽此次葉爾羌阿奇木伯克玉素普節次差派親丁回子
拏獲從逆各犯呈出逆字深知大義見已蒙恩賞給二品頂帶花
翎將來事定功成尤當錫封爵土爾等回子布魯特無論是否從
逆但能及早悔罪投誠縛獻首逆必當一律加以封賞斷不究其
既往儻敢始終執迷不悟則大兵進剿必應殄滅醜類俾無遺種
勿謂傳檄之不豫也如此廣爲宣示或可解散黨羽而渠魁自不

難授首該將軍當善體此意妥爲辦理以期恩威並用早蒞大功並發去硃諭一道該將軍與楊遇春武隆阿閱看此外尙有應行豫籌事宜亦卽早爲備辦總期一鼓集事不可不慎之又慎○頒示硃諭行軍紀律十條○戊午諭琦善等奏籌備啓放王營舊減壩減黃出清漕船可照常行走請飭各省漕幫務於夏初抵壩渡黃等語年來河湖受弊漕行阻滯朕心日深慮念屢諭琦善張井等通盤籌畫以期早開禦壩照常濟運茲據該督等會奏開放減壩黃水消落清水刷滌深通來年重運實可不誤見在趕辦抽河築壩等工所辦已有把握惟黃水須防盛漲應飭漕幫早抵禦壩方免貽誤著有漕各督撫及漕運總督所有明年起運南糧並湖南省尾幫務須早兌早開於四月二十日以前趕抵禦壩五月初旬全數渡黃無許稍誤期限○乙丑諭軍機大臣等行軍之道出

奇乃可制勝前經降旨令長齡等於進兵時籌畫奇策要截兜剿以期聚而殲旃近日朕披覽輿圖有由烏什之巴什雅哈瑪山至喀什噶爾之巴爾昌山草地一路甚屬偏僻非若巴爾楚克由樹窩至喀城爲民回往來熟徑可比且更近捷若彼時一面統領大兵由臺站進發一面酌分參贊一人潛率奇兵由草地鈔出前路兜轉與大兵會合兩面夾擊出其不意掩其不備將該逆裔等就地殲擒不使臨陣竄逸漏網稽誅惟由草地進兵一切軍火糧餉更應裹帶充足必須豫爲設法籌辦且經由布魯特游牧地界尤須加意詳慎勿使驚惶並不至爲賊所覺方爲妥善長齡楊遇春武隆阿素諳輜略長齡武隆阿於該處道里山川尤爲熟習著於會集阿克蘇時詳籌熟計如能由此地分兵鈔截先斷其逃竄之路無難擣穴擒渠卽行商辦或此外另有捷徑可以分翼進兵或

彼時張格爾已離喀什噶爾又復占據他處亦不妨另行相機行事朕止就輿圖形勢指示機宜究竟可行與否該將軍等自能審察決擇以期應手成功不必拘執此諭也○諭長齡奏邁哈默特鄂對自喀什噶爾受張逆主使潛回阿克蘇意圖勾結私遣回子遞寄書信見訊遞信回子供認屬實與長清札商辦理一摺邁哈默特鄂對世受國恩承襲貝子既被張格爾擒獲派人看守何以遽能逃回前據果良額達凌阿奏接據伊薩克稟稱係逆裔遣人執赴阿克蘇要結取城經押送之情蘭回子念其祖父舊恩放令潛逃情節本屬可疑乃竟私差回子與逆裔潛通消息見據拏獲之回子邁瑪得里等供認屬實自應卽刻刑誅長清等接到該將軍覆札當已照辦見復降旨令長清等卽將伊薩克傳至宣示邁哈默特鄂對罪狀嘉獎伊薩克自請出征忠誠一面將該逆正法

一面卽令伊薩克承襲貝子先換頂帶接管阿奇太事務並諭知長清等當善爲駕馭至其居心亦難深信總宜外示優容密加防範卽令其將色提巴爾第巴彥岱二人曾否接收逆信有無逆迹看其如何稟覆詳加察訪以證其言之信否見在伊犁烏嚕木齊官兵將次到齊除留防庫車兵一千名外阿克蘇已有五千名齊慎所帶甘州兵三千名已飭令趕赴阿克蘇合之前有官兵儘可藉資防守以堵爲勦德英阿已奏報八月初四日起程卽可剋日馳赴伊犁長齡一經交卸卽速赴阿克蘇彼時楊遇春自己趕到大兵雲集卽當相機勦辦此時喀什噶爾英吉沙爾葉爾羌情形總未得確實信息卽使城已失守亦斷無漢兵及商民無一人逃出之理該將軍務當偵探實情迅速奏聞以慰廑注又諭長齡奏接據長清信稱該城阿奇木伯克邁哈默特鄂對自喀什噶爾逃

同訊其情節倉皇失措旋據干總程謙拏獲回子三名訊係邁哈默特鄂對差往與張格爾遞送書信所遞之信已交魚子巴什送去並據邁哈默特鄂對供稱阿克蘇伊什罕伯克色提巴爾第之子阿布都爾滿並巴彥岱之婿魯吐普拉都領了張格爾書信給伊父伊岳丈約在阿克蘇造反等語邁哈默特鄂對既被逆裔擒獲何能逃脫其潛同情節本屬可疑見又拏獲爲逆夷送信回子供係該阿奇木差往屬實是其包藏禍心叛逆顯著若不亟正刑誅何以申國憲而杜亂萌此時長清等接到長齡函復機宜如已照辦則已儻尙未辦理即將伊薩克傳至告以邁哈默特鄂對罪狀並諭以爾族係忠盡後裔與張格爾世爲仇敵今邁哈默特鄂對不繩先志叛逆顯然應按國法尙念爾誠悃可嘉自願隨征效力應卽奏明以爾承襲貝子爾益當感奮圖報卽令其先換頂帶

接管阿奇木事務安撫回眾伊薩克接印後該大臣等會同各領兵大員密集在城官兵排列隊伍一面將邁哈默特鄂對傳至當場宣示罪狀卽行正法其拏獲回子三名內邁瑪得里庫吐魯克二犯已據供認差送逆信屬實其尼牙斯素皮一犯據供係跟隨愛仔巴依迎伊阿奇木前去於途次遇見與張格爾送信各犯正盤問閒卽同被拏獲是否狡供亦須究訊明確應否將三犯與該逆一同正法著長清等酌量辦理至色提巴爾第之子巴彥岱之婿俱經張格爾差送書信其子阿布都爾滿其婿魯吐普拉是否俱在阿克蘇其書信會否呈出長清等細心查察有無逆迹伊薩克既令承襲貝子亦當善爲駕馭至其居心之順逆亦難深信總宜外示優容密加防範其隨時稟報軍情一面再加偵察是否屬實並令其密訪色提巴爾第巴彥岱二人逆迹之處看該阿奇木

若何稟覆即可判其真僞見在伊犁烏嚕木齊官兵將次到齊兵威稍振長清等當督率將弁加意防守以堵爲勦毋稍疏虞一俟將軍參贊到彼大兵雲集再行相機勦辦其千總程謙拏獲遞送書信回子三名得以究出邁哈默特鄂對叛逆明正其罪甚屬可嘉程謙著以都司卽行升用先換頂帶賞戴花翎以示鼓勵此外官弁兵丁如能盤獲緊要奸細亦必優加獎擢至伊犁帶兵之領隊大臣祥雲保碩隆武於六月二十七八等日分起管帶起程由冰嶺行走十五臺站何以遲至七月二十二日始到兵二百名其餘官兵尙未到齊殊屬延緩著傳旨嚴行申飭卽飭令帶領官兵小心防守勉贖前愆○辛未臺灣逆匪李通就擒○乙亥諭軍機大臣等長清奏都齊特官兵失陷並見在防守及賊匪分竄情形一摺此次參將王鴻儀千總岳振太在都齊特防堵賊匪由伊勒

都竄至經參將王鴻儀槍斃賊匪四五十名賊匪將千總岳振太圍住因眾寡不敵戰歿賊又將都齊特軍臺燒毀王鴻儀疊次打仗前後殺賊五六百名因鉛丸火藥用完戰歿於陣該員等爲國捐軀情殊可憫參將王鴻儀千總岳振太俱著加恩照例賜卹傷亡官員兵丁著長清查明造冊咨部照例卹賞其兵丁楊自學供內常守備劉把總馬外委及兵丁李成來鉞侯有旺等三名俱被賊獲著長清查明該守備等係何名字並兵丁等見在下落遇便覆奏其陣亡之張千總並著查明名字咨部照例賜卹至賊匪經渾巴什官兵打敗四路分竄經制外委施大勇沙雅爾阿奇木伯克伊薩克帶領兵回續獲賊匪五六十名訊出張格爾差來阿渾二名因敗陣同葉爾羌等處逆回由伊勒都轉逃並供出柯爾坪等處從逆伯克經長清分別正法留質並因烏什告急分兵五百

名交祥雲保帶領前往協防所辦甚屬可嘉昨因烏什存兵不滿
三百已有旨諭知長清撥兵一千名前往幫同防堵矣賊匪所供
柯爾坪等處通賊伯克務須不動聲色拏獲懲辦並就見在留質
各犯訊以喀什噶爾英吉沙爾葉爾羌三城見在情形是否嬰城
固守及張格爾見據何處遇便覆奏經制外委施大勇著以千總
卽行升用沙雅爾阿奇木伯克伊薩克前已賞給二品頂帶此次
復經出力可嘉之至著賞給大段二匹長清卽傳該阿奇木伯克
祇領並諭以爾本忠盡後裔疊蒙嘉獎嗣後如再有出力之處必
當渥膺懋賞用答忠勤所有此次陣亡參將以下等缺卽著由該
處最爲出力人員內遞次奏補其前此拏獲遞送逆信以都司卽
用之程謙著卽升補以示鼓勵長清一面奏聞並一面咨報長齡
等其馬步糧餉俱著照所奏辦理其伊犁後起官兵至八月初六

日尙未到齊疲玩已極該協領等所司何事節經降旨申飭查參
著長清卽查明嚴參懲處見在阿克蘇城及東西北各村莊均屬
安靜長清見飭官兵防守要口並飭伯克等妥爲安撫辦理俱極
妥協仍應防備此次敗回之逆匪等又復湊集多人前來窺伺長
清務道節奉諭旨與提督達凌阿會商督同副將郭繼昌以堵爲
剿賊來則擊賊退勿追俟楊遇春到彼大兵雲集再行相機進剿
可也○以故睿勤親王端恩子仁壽襲爵○以張師誠署禮部左
侍郎前任安撫○顧德慶以病免調李宗昉爲工部右侍郎部調○
丙子給事中郭泰成請勸諭捐輸以儲軍需 上不許○是月賑
江蘇海州等五州縣水災給薩拉齊廳水災口糧貸山西綏遠城
渾津黑河水災口糧緩徵甘肅靈州等五州縣水災旱災雹災浙
江義烏縣歉收新舊額賦

九月己卯朔黃鉞以病免以王鼎爲戶部尙書

由左都御史遷

○辛巳

上幸南苑行圍○諭軍機大臣等長清等奏會商籌辦防剿及和
闐失守情形一摺阿克蘇澤巴什河一帶賊匪前經額爾古倫擊
敗竄回見復探明洋阿里克又有賊匪屯聚自係該逆等隨處勾
結復來窺伺該處沿河一帶及各要隘地方必須分布周密加意
防堵見在阿克蘇已到各路官兵及各處換防兵弁據奏除分派
各處外存城兵止一千七百餘員名前已有旨飭催甘州帶兵副
將胡超等督兵速赴該城聽候調遣自可剋期趕到達凌阿當偵
探賊蹤應剿則帶兵迎擊如覺兵力尙單不能制勝則幫同長清
嚴密防守慎勿輕敵窮追致墮賊人奸計是爲至要巴哈布所帶
土爾扈特兵一千名前經降旨令其旋回各防本境此時旣已趕
到如遵前旨帶兵折回則已若尙在該城卽著暫留協同防堵俟

長齡楊遇春到彼再令旋回至伊犁官兵二千名內前經派往烏什五百名見據奏在阿克蘇止一千名其餘五百名是否尙未到齊抑派赴他處堵禦未經聲明著查明詳悉具奏見在和闐業已失守據兵丁王相泰供詞係因內變所致阿克蘇回子眾多更當加意防範善爲駕馭以後大兵陸續雲集兵威可以震懾再能遇事令其懷畏自不至心生反覆也至達凌阿另片奏見在情形惟有保護阿克蘇烏什庫車三城並阿克蘇迤東臺站等語所見甚是此時逆賊既隨處勾結和闐已失必又窺及他城前據色里克俱有差派布魯特往取烏什之供其庫車有通和闐小路焉知不潛往煽誘長清等當多設偵探查訪詳細一面傳諭慶廉果良額留心防範偵緝總以遵照前旨保守東西城爲要專待大兵會集長齡楊遇春有一人趕到再行相機進剿○甲申諭軍機大臣等

琦善等奏河湖並漲趕緊啓放減壩掣黃接啓禦壩並搶護平穩
及見在辦理情形一摺覽奏均悉河湖連年受病已深本年復同
時異漲該督等既知減黃出清非籌開減壩別無補救之計卽應
堅持定見早爲開放乃遷延時日淮揚先成巨浸而海州仍不免
被淹總由該督等築室道謀辦理延緩所致見於八月二十日開
放減壩建飯下注大溜掣動截至二十五日順黃壩誌椿落六尺
五寸清高於黃一尺有餘見將禦壩拆通據奏俟黃水再減添啓
吳城七堡臨黃大隄俾清水分路暢出以冀大加宣洩當此清水
暢出正可斷流著趁此時將淤墊較高之河身挑挖深通另行取
道放出清水暢資刷濬再行挽歸舊河俾河槽均復舊規爲一勞
永逸之計至見在情形不但回空可期無誤卽來年重運必可北
來但未開禦壩以前清水患其過大宣洩既多清水又患其過弱

此時固期其暢出亦應隨時酌量豫籌收蓄足以濟運至見在河水雖已落低惟距霜降幾及兩旬務須刻刻慎重力保安瀾不可疏忽所奏洪湖於二十三日西北風暴浪湧十三堡息浪庵兩處隄工均有墊塌固由清水過大亦由該工員等所辦石工本不堅固前據該督等估辦堰肝大隄請帑一百七十餘萬必應責成公正明幹道員專司其事總期工歸鞏固帑不虛糜萬不可仍前革率了事及就近取土以便工員任意報銷仍蹈故轍致干重咎其海州東安等處下游被淹處所前據該督等奏請撫恤如此外再有應行撫賑之處卽著據實奏聞候朕施恩其山肝攔湖等壩據奏俟湖水消動卽以次堵閉俾下游得早涸復本年夏間湖水盛漲開放各壩湖水止消四寸若非去路不暢何至如此著該督等於明年卽行勘辦務令去路通暢得以隨時宣洩方爲周妥○丁

亥 上還京師○戊子諭本日吏部將原任江南河道總督黎世序之子黎學瀄帶領引見黎世序前在南河十有三年殫忱盡瘁久慶安瀾厥功甚偉飾終之典前已備極寵榮茲黎學瀄等服闋來京朕追憶蓋臣尤深眷念黎學瀄本係正二品廕生著加恩以主事分部遇缺卽補監生黎學淵著加恩賞給舉人准其一體會試監生黎學澄著加恩賞給副榜貢生應試○已丑轉敬徵爲戶部左侍郎調耆英爲戶部右侍郎阿爾邦阿爲兵部右侍郎奎照爲工部左侍郎以裕恩爲禮部右侍郎補缺○庚寅諭長清等奏見在防堵河口及檳榔附近零匪一摺所奏均悉深堪嘉悅阿克蘇賊匪前經額爾古倫在渾巴什河勦敗此次復敢自喀什噶爾葉爾羌等處糾約回取五六千人在渾巴什河南岸屯聚希圖竄越並訪知波斯圖哈拉塔爾情蘭回莊前經過河附逆與官兵

打仗潛回本村者有一二百人經長清派參將存柱王登科帶領官兵並令三品伯克巴彥岱等帶領分兩路進剿賊匪用木筏分起過河施放鳥槍抗拒我兵槍箭齊發將賊眾全行擊斃生擒賊匪二名又於樹林內搜獲七名奪獲鳥槍刀矛數十件牛羊一千有餘又二等侍衛阿布都爾滿拏獲探信逆匪二名於訊明後卽行梟示均屬可嘉長清辦理防堵事宜俱極妥協此次復連獲勝仗爲殄賊之先聲著加恩賞戴花翎仍交部議敘參將存柱王登科三品伯克巴彥岱俱著加恩賞戴花翎二等侍衛阿布都爾滿認眞出力著加恩賞升頭等侍衛伊子邁瑪特愛孜斯並著加恩賞給金頂其拏獲賊探之軍臺伯克托克塔著長清優加賞賚以示鼓勵長清係兵部司員經尙書玉麟保送副都統朕授爲阿克蘇辦事大臣甫經到任卽能撫馭回眾督勦賊匪動合機宜玉麟

薦舉得人著加恩賞戴花翎爲人臣以人事君者勅長清經朕施
恩獎勵惟當益加奮勉會同達凌阿等督飭官兵嚴密堵捕保障
一方此時長齡楊遇春先後馳抵阿克蘇大兵雲集卽隨同進剿
以副委任○辛卯召穆彰阿來京以楊懋恬署漕運總督由湖北巡撫看
○甲午諭楊遇春奏途次接據阿克蘇馳報剿堵賊匪連獲勝仗
情形覽奏欣悅之至阿克蘇渾巴什河南岸屯聚賊匪竟隲淺渡
河滋擾經達凌阿巴哈布督兵迎剿殲擒賊匪多名突有另股賊
匪由托什罕過河撲圍協領都倫布營盤並分賊斷阻副將郭繼
昌往援之路復經該副將率同都司李遐齡帶兵出營迎敵槍斃
多賊餘匪退避連夜調集額爾古倫所帶防河錫伯兵齊赴都倫
布營盤奮勇衝擊該協領亦與都司孫旺帶領滿漢官兵突圍衝
出兩面夾擊賊眾潰散痛加剿戮賊首奔竄復經兵丁單存等追

及刺斃統計臨陣勦殺及墜馬落河傷斃並搜獲活賊共一千數
百餘名大河以北已就肅清該逆裔屢次差人煽惑附近回莊窺
伺阿克蘇今將竄擾股匪殺戮淨盡並將其賊首庫爾班素皮就
地殲戮實足以快人心而禔賊魄長清遠凌阿巴哈布督率有方
俱著加恩交部從優議敘郭繼昌親率馬隊奪路殺賊立解重圍
最爲奮勇甚屬可嘉郭繼昌著加恩賞給幹勇巴圖魯名號記名
以總兵用都司李遐齡著以遊擊升用先換頂帶都倫布與都司
孫旺帶兵衝圍兩面夾擊賊始潰散亦屬奮勉都倫布著賞戴花
翎孫旺著賞加遊擊銜已革總管額爾古倫戴罪自贖兩次殺斃
賊匪多名茲又隨同奮力勦賊著以千總卽補並賞戴藍翎見在
傷亡滿漢官兵二十餘名除陣亡者先行查明咨部照例賜卹外
帶傷兵丁著長清等卽行查明奏請恩施其餘此次滿漢蒙古官

兵尤爲出力者並著長清等據實詳查統交長齡分別奏請鼓勵

○丙申韓鼎晉以病免調張師誠爲倉場侍郎以白鎔署禮部左

侍郎

學士

○丁酉詔諭哈薩克汗阿勒坦沙拉昨伊犁將軍代

奏爾遣爾弟台吉江錫爾呈遞摺內知悉爾父托霍木身故朕心

惻惻悼惜之至自爾會祖以至爾祖父世世深沐國恩茲爾父身

故特由遐荒遣爾弟恭請朕安呈進貢馬及聽如何辦理請示於

伊犁將軍情詞甚屬恭順朕心不勝喜悅此汗爵摩自爾會祖延

及爾祖爾父爾卽係托霍木長子卽加恩著爾襲封鈐用御寶降

給詔旨並賞給大段四匹到時敬領爾自此感戴朕恩於爾屬下

哈薩克人眾妥爲管束友愛子弟嚴緝盜賊和睦鄰夷遇事俱遵

伊犁將軍指示而行常承鴻恩於無替勉之慎之母許忠荒特詔

○是月給貴州松桃廳山西歸化廳江蘇山陽鹽城二縣江西蓮

花等七廳縣水災口糧銀穀緩徵山東臨清等三十九州縣及屯坐各衛被災通糧直隸滄州等十五州縣被災新舊額賦旗租展緩山東德州等十五州縣直隸開州等十五州縣通賦

冬十月己酉朔諭昨據戶部會同吏部議奏推廣常例酌增事例條款一摺已依議行矣同日又據御史黃德源奏稱滿漢廕生世職及各正途出身之子孫弟姪俱准報捐易滋流弊更恐新例一開且將常例條款議增必不能及每年常捐之數等語古人籌備軍儲原有輸粟於邊之議見值勦辦逆回軍需繁重雖口外存糧充裕而轉運一切經費必須寬籌斷不能以內地歲入之常經盡出爲荒徼行軍之用茲經部臣會同議奏於見行常例之外不得已推廣酌增條款專爲見在軍興而設仍嚴定限制以免流品涇淆其常捐事例參酌情形分別應增應減並未一律加增更與另

開新例者不同御史職司言路凡遇臣工議奏之事有未允協者原可於具奏通行後據實直陳如果所言可採卽已經施行亦不難飭令改議乃該御史於該部會奏時同日陳奏試問該衙門所議條款尙未具奏通行該御史何由得知非有意沽名卽近於取巧此風斷不可長黃德濂本應重究念係言官著從寬交部議處

○辛亥諭琦善等奏本年開放各壩以洩洪湖異漲見在趕緊堵閉統計十月初七日以前均可全竣惟昭關壩跌塘較深須俟來源微弱始可剋期堵閉等語見在清水消落將吳城七堡先行堵閉並將束清禦黃兩壩口門收窄淤蓄清水來年重運自可足資浮送仍須清水暢出藉以刷滌黃淤其高堰隄工亦當及時修補完固並將昭關壩察看情形相機堵閉毋得過遲俾下游各州縣積水田地及早潤復毋誤春耕該督等務當隨時斟酌熟商妥辦

期於河運民生均有裨益○庚申諭軍機大臣等據長清等奏傳
詢自喀什噶爾前來兵丁問義巴蘭供稱喀什噶爾漢城於八月
二十五日被賊攻破慶祥自縊身死舒爾哈善不知下落賊將官
兵商民從城內擄出約有六七百人活捉官兵三百餘人盡行圍
起將髮辮翦去脅令投降並將城牆及衙署兵民房屋全行拆毀
止留鋪民房屋二處作爲辦事地方旋有張格爾辦事回子將伊
等帶至城內去看見城牆房屋俱已拆毀又帶至英吉沙爾葉爾
羌和闐三處看明衙署民房均被燒毀惟留葉爾羌西府衙門樓
房據帶去賊匪令伊等回至阿克蘇告知各處城池房屋俱已拆
毀官民全行殺害叫阿克蘇官兵不必來喀什噶爾四城來亦無
益並據看明張格爾面貌見在喀什噶爾阿奇木衙門等語覽奏
曷勝憤恨該逆裔既將四城攻陷轉將各處衙署民房盡行拆毀

不爲占據堅守之計是該逆等探知大兵雲集一經接仗不利卽思就近竄逸已可槩見其特地將兵丁閭義等放回之意亦不過欲緩我師期本日據武隆阿奏先後所調各路官兵必須年內方能到齊時屆嚴寒擬令暫爲休息統俟一切籌備齊全竟於開正專力進剿此時西四城業已失守無可救援自應籌備周妥再圖克復但兵貴神速若遇有機可乘亦不可稍爲拘泥如探明張格爾仍住居喀什噶爾回城外其葉爾羌等處止有賊黨分住自以密速進取喀什噶爾爲急一面揚言官兵駐守阿克蘇烏什且不進剿以懈賊心一面先分奇兵繞越兜轉斷其歸路再統率大兵由英吉沙爾等處前進兩路會合夾攻總須專注喀什噶爾將張格爾擒獲盡法懲治方足以伸國憲而慰忠魂斷不得稍事疏略致令竄逸有干嚴譴其葉爾羌和闐二城似可作爲後圖儻張格

爾潛往別城則須另作計較前已有旨令該將軍廣張告示宣諭
布魯特效順幫擒逆裔今武隆阿又有宣威布賞曉諭霍罕安集
延等外夷之請前聞斌靜會強占安集延回子之女經其父將其
女砍落頭顱摺入斌靜署內怨恨已極見據閭義等供果有安集
延頭口助逆情事昨長齡有霍罕將張格爾家屬拘禁之說從前
玉努斯向霍罕購求張格爾不爲無因此時應如何設法用閒令
該逆等與外夷彼此猜忌攜離將其獲獻該將軍等當妥速商籌
辦理慶祥嬰城固守爲國捐軀朕垂淚覽之可憫之至已明降諭
旨褒卹至其屍身據該兵丁等供稱有兵丁翟鳳鳴移置上房安
置此時衙署被賊拆毀慶祥屍身作何下落務須於克復喀什噶
爾時先行查明輿輓回京其舒爾哈善印登額多隆武蘇倫保奕
湄桂斌及各城被害官弁兵丁均著查明實在情形分別奏咨辦

理祥雲保額隆武帶領伊犁官兵行走遲緩據長齡查明實因冰嶺難行馬匹多有倒斃徒步背負衣履軍裝而行以致遲緩情尙可原祥雲保額隆武俱著免其議處責令奮勉圖功以贖前愆其所帶甘州兵三千六百名前令副將胡超等先行管帶前往究於何日到齊未據長清等奏及著長齡等查明該官兵行走有無遲延並將以後所到官兵每到齊一起卽附奏一次以慰廑注武隆阿見因關外程站較大兼多戈壁不能兼程前進亦應加緊催趕不可遲滯總期早到一日得早一日商辦爲要○贈慶祥太子太保賞治喪銀一千兩入祀昭忠祠○壬戌免兩淮富安等十四場水災蠲課○甲子諭朕以兩淮鹽務敝壞已久會煥前任兩淮運使十餘年又歷任巡撫藩司特命以二品頂帶補授鹽政期資整頓朕御極之初已將每年玉貢折價銀兩停其交納並免節年未

解未報玉貢銀一百六十餘萬兩迨會煥抵任後又奏請將商捐未解銀五百十四萬餘兩全行豁免其餘隨時奏請調劑無不加恩俞允原冀科則減少從此認真清釐庶離務日有起色且令久於其任俾得從容辦理乃會煥在任四年有餘並未能設法整飭一味因循了事若稍有天良之人斷不至此此時任滿回京豈能復邀對品錄用會煥著以五品京堂候補以示薄懲○諭軍機大臣等琦善等奏減壩池下正河原擬挑深一丈有餘見因順黃壩上下河身較前跌深估挑正河俱須一律加深確估經費稍有加增而河底較前深通於河漕大有裨益總冀工用一歸撙節工程隨處認真等語此次開放減壩估挑正河不惜數百萬帑金原爲一勞永逸之計見自減壩開後順黃壩上下河身旣已跌深自應將減壩池下挑工普律加深庶將來挽復正河暢達東注永收清

水刷滌之益方不至帑項虛糜該督等既知工用撙節隨處認真但不可因意存節省或致工程稍有草率亦不可名爲認真仍滋工員浮冒積弊總須言行相符方爲盡心國事所請工費三百八十萬兩前據奏稱統計挑河築壩堵合口門及一切土堵各工共需此數至何項工程估需若干並未分晰聲明此時雖不能得各工實用確數當可約略估計著將一切挑河築壩等工何項約需銀若干分晰開單具奏其增培大隄前已飭撥銀一百七十七萬餘兩諭令遴派公正明幹道員專司其事此時湖水雖已少落正值西北風司令之時保護尤關緊要見派何員督辦何日興工尙未據該督等奏及兩年來種種費帑興工病民累漕皆因高堰石工未固所致若此番增培大隄再不能一律堅實照常蓄洩該督等自問當得何咎見在淮揚及安東海沭一帶皆成巨浸小民蕩

析離居飢寒交迫該督等能無蒿目傷心不但昭關等壩亟宜堵
合卽王營減壩亦不能日久開放致下游田畝無涸復之日再誤
來年耕種前經降旨飭將下河歸江歸海之路設法疏通若不急
於疏治無怪昭關等壩之不能速堵至減壩堵合之期原視正河
挑竣之遲早該督等一面速飭委員等疏治下河堵閉開壩一面
督飭將正河挑工刻期如式完竣卽速將王營減壩堵合黃流挽
復故道俾下游民田早一日涸復災黎早一日復業方爲不負委
任○撥江蘇藩關道庫銀一百四十五萬兩賑高郵等三十州縣
衛水災○戊辰賜李相清等三十一人武進士及第出身有差○
諭河工要務全在冬勘春修每年豫發歲料銀兩飭交工員乘時
購備將料垛土牛堆積如式該河督向於霜清水落之後前往沿
河詳驗以杜架空浮鬆之弊並將應辦春工周歷履勘悉心覈估

一交春令次第興修剋期竣事再行親往驗收查明料物用存確數以備伏秋兩汛之需卽遇有險工斗出備料足資應手是以鮮有失事朕聞自嘉慶年間以來各河督等習於安逸往往不於霜降後逐段親詣勘驗以致工員等將虛貯花堆剋扣偷減諸弊視為固然甚或有估辦春工時輒以不應修而修轉將應修處所賠留爲大汛搶險地步以便藉另案工程事起倉卒易滋侵冒著各該河督等於例屆冬勘及次年工竣時務須親歷河干詳加勘驗料垛必禁其虛鬆工程必期其堅實各宜不憚勤勞力除結習並嚴飭通工員弁仍不得藉公帑以肥私囊尤須懲奸胥而斥劣幕如有敢蹈前轍仍踵積弊者卽當隨時嚴參懲辦勿稍寬貸○己巳甘肅提督齊慎丁憂賞治喪銀二百兩仍留軍營協剿○辛未皇次子奕綱生○丁丑添設直隸大名鎮中營遊擊守備各一

千總二把總外委各三額外外委六裁天津水師營參將守備各
一千總二把總三外委六〇是月給安徽宿州等八州縣衛被災
口糧蠲緩江蘇高郵等四十七州縣衛被災民新舊額賦緩徵陝
西榆林縣湖北沔陽縣等十六州縣河南睢州等二十二州縣安
徽宿州等二十四州縣衛災民新舊額賦展緩山東平陰縣通糧
十一月戊寅朔諭富俊奏遵令流民搬移移設卡倫添立封堆一
摺吉林爲我朝根本重地所有潛住流民必應全行驅逐因恤其
無業可歸前經降旨富俊妥議章程飭令依限遷徙茲據該將軍
奏該流民陸續搬進卡倫以內分散居住共有六百餘戶尙有三
百餘戶月內總可搬移淨盡惟額赫穆屯卡倫至黃溝卡倫相距
六十餘里並無界限必須添立封堆移設卡倫俾資巡查周密著
照所請准其於該兩卡倫之間按地一里挖設八尺高大封堆一

座並將白石砬卡倫改移於額赫穆黃溝兩卡倫適中之地改名
三箇頂子卡倫該三處卡倫官兵常川安設三月一換時加嚴查
上下班更替時各出具卡倫外並無一戶流民居住甘結以備稽
覈該將軍飭令將未遷之三百餘戶務須勒限搬移不准容留一
戶嗣後仍當隨時認真稽查斷不准再有民人潛往居住毋得日
久玩忽仍蹈故轍致干重咎○移江西贛州府通判駐贛縣大湖
江○己卯諭予告戶部尙書黃鉞在內廷行走二十七年勤慎趨
公克盡厥職前以精力頓衰加恩在家支食半俸茲據奏擇定行
期因念黃鉞年近八旬嚴寒就道朕心彌深廕注著加恩賞給人
蔭八兩俸資調攝以昭優眷○辛巳諭李鴻章等奏稱進勦逆回
需費較繁請將粵東藩庫封貯及運庫鹽本項下動支銀三十萬
兩解甘備用於該督撫及司道知府養廉內分作十年勻扣歸款

等語各官額設養廉原以資辦公之用若因邊陲偶有軍興輒紛
紛奏請攤扣於用度未免支絀且亦不成政體所有該督等奏請
動支銀兩解甘扣廉歸款之處著不准行○准粵東洋鹽各商捐
輸銀一百萬兩備回疆軍需○壬午諭軍機大臣等據琦善奏宣
洩清水各壩河已堵合昭關壩亦於十月二十四日挂纜合龍
時屆仲冬淮水並不歸槽湖水閒日加長已至一丈六尺五寸是
向例各閘壩應齊開宣洩之候本年轉成堵合之時卽堰肝大隄
已加幫寬厚及見在趕辦之處究屬土工在常年尙可抵禦若以
禦多蓄之水則風暴斗起仍難保必無汕塌近日上游徐屬黃河
尙報長水臨黃之黃家灣吳城七堡均又清黃相平不能宣洩僅
恃禦壩一路西風日起大局可危正副河臣欲宣洩則各壩俱經
堵合思他籌又別無去路深恐坐待貽誤等語本年啓放王營減

壩係琦善等三人公同熟商定議朕不惜帑金不爲遙制悉照該督等所議辦理原爲減黃洩清俾河湖運道漸復舊規始爲湖水異漲過早大啓各壩宣洩迨各壩宣洩不暢趕開減壩以爲啓放禦壩宣洩湖漲之計前據該督等奏自開壩後黃水低落六尺五寸清高於黃一尺有餘何當茲隆冬水弱之時臨黃之高家灣吳城七堡輒又清黃相平是此時黃水自減壩建瓴下注又值水涸之時尙不能大加減落轉瞬春漲經臨勢必又成倒灌此番作爲均歸無益前此大啓開壩洩及下游田廬甚廣獨賑兼施朕尙以該督等爲保護湖隄權及利害之輕重辦理不加深責然若設法早爲疏消何至令淮揚各屬久在巨浸之中卽前降諭旨催令堵閉開壩亦因災民蕩析離居冀使涸復早得歸業該督如以一二處開壩尙應緩堵卽當據實奏聞乃旣經堵合又謂宣洩無路深

恐貽誤豈以將來事機不利卽可以此奏爲卸責地步耶見在攔黃壩下挑工已有若干若挑竣後不能先引清水刷濬將來挽復故道以人力之挑空豈能抵黃流之淤墊爲時無幾又將梗阻如故豈非以數百萬帑金付之一擲該督等自問當得何咎總之經此次興辦大工之後黃水務期其暢達湖潞務保其安恬漕運務使其順利儻一經債事致運道再有阻滯惟該督等是問此外無可再論矣○戊子諭長齡等奏官兵將柯爾坪回莊逆賊剿洗淨盡一招覽奏嘉悅阿克蘇官兵前將渾巴什河南岸賊匪剿殺淨盡該逆裔復派賊目帶領喀什噶爾葉爾羌賊匪並糾約柯爾坪南北兩莊從逆餘匪通計三千餘人恃險踞守並阻截大兵追剿之路該將軍等飭令楊芳督率官兵前往剿辦該逆匪抵死迎拒經楊芳分派將備兩路鈔截賊勢洶湧副將胡超身先步戰斃賊

數人眾力隨攻殺賊過半餘賊潰竄南莊復兩路夾擊追殺十餘里直至大赦紫爾卡倫以外將賊匪全數殲除並無一名免脫生擒活賊七十三名搜獲婦女五十四名口於賊屍中據活賊認出賊目約勒達什伊賚玉努斯熱依木托胡坦五名割取首級並奪獲槍矛腰刀撒袋鉛丸火藥及馬牛羊隻無算長齡楊遇春初到軍營卽獲勝仗已褫逆首之魄此皆該將軍等輯畧嫺熟兵將一心督率有方所向克捷著賞給長齡四喜白玉搬指一箇嵌寶石小刀一把珊瑚豆大荷包一對小荷包兩箇楊遇春雙喜白玉翎管一箇珊瑚豆大荷包一對小荷包兩箇楊芳白玉翎管一箇白玉搬指一箇大荷包一對小荷包兩箇火鏢一把小刀一把楊芳仍著交部議敘胡超著賞加總兵銜以示嘉獎其餘打仗出力人員業經該將軍等存記俟奏到再行加恩傷亡官兵咨部照例卹

賞○己丑以臺灣餘匪悉平加孫爾準太子少保○壬辰諭軍機大臣等據御史汪琳奏淮揚一帶運河減洩之水向由東隄各閘壩經下河各州縣境內匯入串場河分流注海中開支汊雖多而入海之路止有鹽城縣之新洋港關龍港東臺縣之王家港泰州之小洋口四處自乾隆年間設閘疏濬數十年來海口疏通河流暢順間遇湖漲宣洩不過稍爲浸溢旋即涸退迄今年月深遠瀕海諸港口泥沙壅滯今歲七月間啓放昭關車邏等壩減洩湖水見在將及半年而下河各州縣地土未乾田疇莫墾百姓流離轉徙且瀕海鹽場因場河積水未消竈丁束手請將注海各港口及時疏導先由運庫籌款墊給後歸運場各商按引派繳商捐官辦等語本年開放閘壩減水下注洩及下河各州縣昨據琦善奏昭關壩已經堵合田畝漸次涸復惟前此宣洩不暢皆由入海港口

淤塞所致節經降旨令該督等設法疏導今該御史又爲此奏必
應迅速勘辦俾民田場窳均爲有益著琦善先行遴派委員覈實
估計一面與張青選會同商酌此項工程銀兩是否可由運庫先
行籌款墊發將來歸運場各商按引派繳其宣導事宜務飭承辦
之員妥協經理勿致徒糜工費仍無實效也○癸巳以昇寅爲熱
河都統特登額爲刑部右侍郎

由內閣學士遷

○乙未諭我朝皇子皇孫

及近支宗室命名自

聖祖仁皇帝親見曾孫以永字肇錫嘉名

迨我

皇祖高宗純皇帝繼見曾元慶衍五代卽依派系以永絲

奕載四字排序成文按字開支洵足兆奕世雲礽之慶此後宗支
蕃衍瓜瓞縣延亦當光紹 前徵豫摛吉語以迓禎祥俾世世子
孫引用勿替著大學士軍機大臣公同選擬十字候朕酌定其載
字以下輩分卽照見定衍派之字命名我國家景祚延長繩繩繼

繼遵茲令典接續擬增億萬斯年永承篤祜○諭我國家篤念懿親惇睦宗族自太祖太宗派系流傳譜列銀潢者文則增設曹司武則簡備環衛又復許應科舉通籍臺閣其間散者亦皆月支銀糧人給頂帶俾得榮遘章服優贍身家惟因世緒縣長宗支蕃衍每以限於宗室體制額缺不得與覺羅人員同廣登進朕每宵旰籌思昨閱會典內稱凡玉牒所載以顯祖宣皇帝本支爲宗室伯叔兄弟之支爲覺羅是因派系之親疏以定支屬之等殺稽諸歷代史冊所傳或以九族定尊卑或以五宗紀遠近甚至疏屬散處郡邑幾等編氓我朝誼重親親迥異前代見在派衍日蕃人才輩出與其限於體制多令賦閒曷若釐以等差俾廣進取况祖宗成憲具在區分宗室覺羅甚明敬當倣照釐定其自太祖以下支分應以服屬幾世者爲宗室幾世者爲覺羅之處

著大學士九卿會同宗人府詳覈妥議以聞○丙申諭長齡等奏
訊明拏獲活賊供情一摺柯爾坪南北回莊屯聚賊匪前經楊芳
帶領官兵勦洗淨盡臨陣殲斃賊目玉奴斯阿渾等五名已經活
賊指認見據薩依特等供稱已斃賊目皆係該逆自喀什噶爾葉
爾羌英吉沙爾先後遣來其前在阿克蘇帶箭逃回之伊斯拉木
素皮見亦於賊屍中令活賊認明屬實是該逆裔所遣賊目悉就
誅夷無一倖脫將來大兵進勦自不難拉朽摧枯惟是各城死事
大臣官員見據賊供或力竭自盡或臨陣捐軀聞之實深憫惻除
慶祥業經賜卹外葉爾羌辦事大臣副都統印登額英吉沙爾領
隊大臣副都統蘇倫保俱著加恩照都統例賜卹喀什噶爾幫辦
大臣頭等侍衛舒爾哈善葉爾羌幫辦大臣副都統銜多隆武和
闡領隊大臣頭等侍衛奕湄幫辦大臣副都統銜桂斌俱著加恩

照副都統例賜卹卹登額等應得世職俟伊等之子百日孝滿後由該旗帶領引見其未及歲者著該旗奏明承襲已革回子郡王阿奇木伯克玉努斯前經賞給五品頂帶隨同慶祥赴喀什噶爾辦事見亦爲國捐軀著加恩賞給一品職銜照頭等台吉例賜卹其餘死事官員兵丁俱著該將軍查明咨部照例卹賞○諭軍機大臣等長齡等奏訊據活賊供出西四城失守官兵死事情形覽奏實堪憤惋已明降諭旨加恩賜卹矣該逆夷自占踞西四城雖據賊供多用安集延回子管事舊時伯克惟博巴克邁瑪特伊斯二人外他如阿布都拉等皆不管事最信用者是愛薩一賊檢閱慶祥前奏愛薩木薩兄弟二人係霍罕逃臣爲張逆羽翼此時該逆所用之安集延回子焉知非安集延逃出之人爲逆裔所勾引與愛薩相同此時安集延是否助逆總不必深究其來歷見在該

逆裔終日向從逆伯克索要婦人並縱容夥黨焚索其鼠竊情形已可槩見阿布都拉等從逆之後既不得信用未必不無他志該將軍等前欲引爲內應正可藉此離間其愛薩等見爲張逆所信用總須設法招致或可令其羈縻逆裔不至逃竄俾得一鼓殲擒此時既無布魯特在彼助逆愛薩又係霍罕逃人將來張逆勢窮力蹙必以安集延爲遁逃藪必當鼓勵布魯特阻其去路方不能越境遠竄該將軍等當悉心妥籌相機辦理武隆阿日內卽可到彼自己將該逆裔盤踞處所及分出奇兵道路偵探明確一俟吉林黑龍江頭起官兵到有千餘卽當察審形勢剋期進發不可坐失事機是爲至要至慶祥屍身見有埋葬處所將來事定後當輿送回京俾正首邱葉爾羌阿奇木伯克玉素普會獻阿布都拉逆信見在圈禁在彼俟收復葉爾羌時亦當查出升賞以昭忠盡再

據奏轉運存貯糧石所雇回子二千名飭令伊薩克選派能事伯克十名分帶管束一節該阿奇木帶兵得力應令其著賴軍前其照料運糧事宜止當飭其選派能事伯克前往足資管束所有接獲婦女幼孩一百三名口著卽分賞出力回子斷不得令滿漢官兵私得一人也附報發去密封一件該將軍參贊等密行拆閱○辛丑緩徵供應兵差之甘肅狄道等三十七廳州縣暨沙泥州判紅水等三縣丞西固州同所屬額賦○壬寅諭軍機大臣等琦善等奏堰圩墾塌石工閒段湊成三千餘丈業經搶護平穩見仍嚴密防範分別宣洩一摺本年湖水盛漲雖異往昔然已節交冬令又於啓放仁禮兩河後復啓智壩宣洩何以消水仍不甚暢自係湖底淤墊日高未必全由於淮水來源之旺盛見在甫遇西北風暴卽將新修石工塌至三千餘丈之多舊工不過百餘丈可見新

工全不足恃原修原估工員喪心昧良於斯可見刻因工程緊要所用錢糧先由河庫墊發惟此次墊發若干內有著落各工員賠修應行追繳者若干該督等當詳查確估分晰奏明嚴限著追不得稍滋宕延其塌卸二段見雖倉卒搶護必須一律修補完整毋得仍前草率一遇風浪衝擊又形掣塌時值嚴冬風信無常該督等仍當督飭所屬加意保護防範毋致再有疏虞爲要又據另片奏減壩以下挑工分段趕辦年內外即可蒞事前議估挑引渠繞至攔黃壩以下引清刷濰先經飭令道將督率廳營勘估俟正河挑竣之後辦理等語此次挑工原期去黃河中段之梗阻若但憑人力而無清水大加衝刷將來挽復正河之後一經黃水灌注勢必又形淤墊該督等既經委員將引清之路先行勘估自當於正河挑工完竣相機趕爲辦理總期清水實能刷黃黃水暢注歸海

運道河防兩有裨益方爲不負委任○癸卯漕運總督署山東巡撫陳中孚卒予祭葬○調程含章署山東巡撫劉彬士署浙江巡撫命邱樹棠以三品銜署刑部右侍郎調梁章鉅爲江西按察使以鍾祥爲山東按察使由充沂曹濟道遷○丙午諭已革回子郡王阿奇木伯克玉努斯隨同慶祥在喀什噶爾辦事爲國捐軀前經加恩賞給一品職銜並照頭等台吉例賜卹茲據理藩院查奏回疆則例內並無頭等台吉陣亡優卹專條玉努斯應如何賞卹之處著兵部會同理藩院再行覈議具奏尋議上得旨照提督陣亡例給予卹賞銀八百兩其應得世職著加恩授爲三等台吉世襲罔替○准淮商捐輸銀二百萬兩備回疆軍需○齊布森以病免以海齡爲盛京工部侍郎由左副都御史遷○是月加賑湖南茶陵等三州縣災民貸甘肅秦州等十三州縣災民口糧蠲緩盛京牛莊等處水

災糧租湖南茶陵等五州縣水災新舊額賦緩徵江西南昌等三縣甘肅河州等十二州縣新舊額賦

十二月戊申朔晉封靜貴人博爾濟吉特氏爲 靜嬪○ 御定

宗室世次命名用溥毓恆啓四字載字輩分下近支宗室內奉字輩著改用溥字○庚戌諭朕以雲仍衍慶卜世延長前經降旨於奕載輩分以下續增溥毓恆啓四字按序命名引用勿替因思避名之典歷代相沿我 皇祖高宗純皇帝特降 諭旨御名缺筆書寫以存其義復 諭以奕字輩以下亦可推廣此意永遠遵行朕思命名之字既經排次酌定昭示來茲自應崇效 聖謨將缺筆書寫之處豫示折衷以垂法守將來億萬年繼體承統者奕字寫奕載字寫載溥字寫溥毓字寫毓恆字寫恆啓字寫啓嗣後遵茲令典接續奉行萬萬世子孫率循罔替此旨著軍機大臣敬謹

存記並繕錄二道一交內閣封貯一交上書房恭貯敬識前降選
用薄毓恆啓四字諭旨一道亦著繕錄一分交上書房存記○癸
丑諭軍機大臣等陶澍奏見辦漕務情形嚴禁籽棍包漕橫索陋
規等語所奏甚是江蘇漕務疲敝已久閭閻每苦浮收而各州縣
用度浩繁不能不藉資津貼抗玩者卽因此挾制以爲控端積習
成風互相詬病必應力加整頓務令兩得其平既不使不肖官吏
婪索病民亦不容籽棍把持藉端訐告庶可官民相安而刁風漸
息如所奏旗丁津貼一項前經奏定每米一石給銀二三錢多者
不得過五錢漕督統轄旗丁自應飭屬嚴查不准絲毫多索而地
方大吏深知疲丁苦累亦不得不照奏定數目令各州縣酌量給
發俾漕船得以遵行此項銀兩計漕多之處卽須用三四萬至六
七萬不等各州縣稍有浮收原非必藉以入己而包漕籽棍藉此

橫索陋規不可不亟行革除據奏富豪之家與稍有勢力者皆爲大戶亦有本非大戶而詭寄戶下者其刁生劣監平日健訟者則爲訟米完納各有成規而訟米尤甚稍不遂意非逞兇鬧倉卽聯名捏告藉控爲抗包攬分肥人數最多之處生監或至三四百名漕規竟至二三萬兩竇駭聽聞各州縣費無所出自必取償於鄉曲之醇良小戶爲牽長補短之計而窮民不堪朘削樂於詭寄糧名大戶生監等包攬愈多盤剝併吞勢所不免將致小戶之糧田日少辦漕之經費日絀不釀成巨案不止該撫旣經見及自必能早爲之計力挽頽風著卽督同藩司將收漕章程體察情形分別酌定毋許浮多並嚴禁道府需索漕規及上司同僚掣交幕友長隨等弊一面飭屬遵照一律兌收矜棍陋規痛行裁革此項積弊已八人數眾多當整頓之初怨謗沸騰甚或糾眾肆鬧捏詞京控

固爲勢所必至該撫當不避嫌怨不稍偏徇毋庸豫存畏蕙之見
遇有控告漕案者卽查其有無抗欠是否糧戶如實係生監包攬
或大戶紳士恃符刁抗或有漕而米未交清或集審時原告藏匿
或不候訊結潛逃驀控均卽提拏嚴審奏明分別治罪朕必從重
懲辦並著該撫移咨學政一體查察如浙江學政朱士彥於貧生
拖欠錢糧無論數目多寡悉行扣考固覺過重若拖欠較多實係
有心抗糧者亦應停其考試俟完清後再行補考儻有仍前縱恣
者該學政亦卽查明斥革移咨該撫審辦不得稍涉徇縱至各州
縣被控浮收銀米總宜查明是否格外增添有無侵吞入己分別
辦理惟在該撫一秉至公實心整頓不徒出示曉諭仍成誥誡之
虛文也○以楊健爲湖北巡撫由甘肅布政使遷○以訥爾經額爲漕運
總督調賀長齡爲山東布政使以梁章鉅爲江蘇布政使福珠隆

阿爲江西按察使

由浙江運使遷

○戊午諭昨據戶部奏大興縣民陸

有章宛平縣民伍雲亭等呈請於宛平等五州縣開採銀礦朕以地近京師及易州一帶非他省可比其於地脈風水有無妨礙飭令那彥成陸以莊等派委公正大員詳加查勘再降諭旨朕復思各省銀礦向俱封禁況畿輔重地且附近易州一帶詎可輕議開挖著直隸總督順天府停止委員履勘至該民人具呈時該部卽應飭司批駁英和身爲協辦大學士非不諳政體者可比乃率行據呈具奏事雖因公但視朕爲何如主冒昧之至不可不示以懲儆英和著調補理藩院尙書退出南書房總管內務府大臣仍交部嚴加議處其餘戶部堂官並不詳加體察隨同畫諾王鼎敬徵湯金釗耆英顧皋俱著交部議處尋議上得旨英和著加恩改爲降三級留任王鼎敬徵湯金釗耆英顧皋著加恩改爲降二級留

任俱不准抵銷○調薩恩爲戶部尙書穆彰阿爲工部尙書

由理藩院

○己未改臺灣鎮標右營遊擊爲北路右營遊擊駐竹塹移竹

塹守備一員駐大甲撥鎮標右營千總把總外委各一員歸守備

管轄移右營把總一員駐銅鑼灣外委一員駐斗換坪○庚申以

桂輪爲內閣學士兼禮部侍郎銜

補辦

誠端爲左副都御史

由大理寺

○辛酉諭朕前聞喀什噶爾歷任參贊辦事大臣種種乖謬

節經降旨交長齡等據實確查茲據奏自嘉慶二十年起該處歷

任大臣內如松福聲名平常各城皆知雖查無實在劣蹟其辦理

不善已可槩見松福著革去三等侍衛永不敘用斌靜在任事事

妄爲姦竊回婦及安集延回子薩賴占之女致薩賴占氣忿自行

割傷幾致釀成人命荒淫已極若於在任時早經發覺卽應照乾

隆年間高樸之案立予正法該員業經發往黑龍江釋回兩目俱

替亦不能竟予寬貸著拏交宗人府會同刑部嚴行治罪色普徵額於嘉慶二十五年八月內張格爾入卡滋事時令參將玉森帶領步隊迎敵該員挑帶滿營馬隊繼進彼時賊眾不過一二百人該員等追至霍爾罕莊若使趕緊撲捕即可永除後患乃逗留不進貽誤事機若卽時發覺亦應立正典刑茲已事逾數年色普徵額著革去三等侍衛拏交刑部嚴行治罪伊子博勒洪武並著革去二等侍衛逐出乾清門至上年張格爾在卡外游奕永芹與巴彥巴圖並未確探情形又不詳慎勦辦巴彥巴圖率將汰劣克家屬妄行誅戮旋致全師被害若使其身尙在亦應從重治罪見已身故著革去副都統銜及加賞世職永芹於巴彥巴圖在卡外妄殺無辜雖未豫知伊身任參贊大臣辦理疏忽咎無可辭伊子縣煥縣星前已降爲奉恩將軍著將縣煥縣星再行革去奉恩將軍

以示懲儆○壬戌以朱桂植署禮部右侍郎服闋山○丙寅以福建各屬歉收准暫弛海禁販運浙米○戊辰大學士楊威將軍長齡等奏烏什卡外皆布魯特游牧卡內亦有布魯特居住此時大兵漸次雲集正當分紮鎮撫回夷前閱張格爾有遁賊前來烏什之說雖不足信亦不可不防况我兵進剿喀什噶爾應由該處出卡取道潛往此時正可揚言撥兵駐守將後路運糧陸續運存貯見飭提督齊慎帶同侍衛蘇清阿及馬步官兵三千六百餘名前赴該處將祥雲保原帶之伊犁官兵一千名卽與巴哈布蘇清阿分帶再於前次撥往之烏魯木齊滿洲兵內撥出五百名選派諳練協領一員管帶均交齊慎統領於卡內卡外擇要分營駐紮防守其餘尙有烏魯木齊官兵一千名以五百名留爲守城以五百名另派協領一員帶領於卡內各處常川往來校緝巡查再前

因阿克蘇地方緊要駐防官兵無多經長清奏明就近調撥喀喇沙爾官兵三百名飭令參將存柱帶領來城防守喀喇沙爾另調烏魯木齊官兵二百名前往代防見在阿克蘇已有大兵駐紮前調喀喇沙爾官兵臣等卽飭該參將帶回喀喇沙爾其該城所調烏魯木齊官兵亦卽飭令回營歸伍報可又奏謝領揚威將軍印信恩得旨卿同兩參贊大臣務要合力同心早擒首逆恢復四城速建大勳共膺懋賞朕佇望捷音之至也又奏謝其子桂輪隨營效力恩得旨鋒鏑之下不可妄遣朕以卿年近七旬特命伊隨侍左右兼可練習也○辛未諭據長清等奏查明斌靜色普徵額等前在喀什噶爾荒謬失機當降旨革交宗人府刑部治罪茲據審奏斌靜荒淫不法取證確鑿色普徵額逗留觀望貽誤事機以致養癰貽患失陷城池經該衙門均擬斬候實屬罪所應得斌靜著

宗人府圈禁色普徵額著刑部監禁俱歸入明年朝審情實○是月緩徵江蘇高郵等六州縣歉收新舊額賦○是歲朝鮮琉球入貢